

Tico Croes di AVP ta muestra cu pruebanan ta worde acumula

Pagonan Gobierno/APAT/MEP ta hole corrupcion

ORANJESTAD(AAN)--

Aruba Planning and Advisory Team tin su sede na North Capital Street na Washington. Na Aruba mes e grupo a bira conoci a base di supuesto trabaonan, cu e grupo lo ta haci pa Gobierno. Awor e nomber ta bolbe worde menciona pa AVP y Tico Croes, Miembro di Parlamento pa AVP, ta bisa cu un que otro tin holor di corrupcion.

E asunto di APAT, manera nomber di e compania ta worde abrevia, a cuminsa lora publicamente ora dia 23 di Juni 1989 Tico Kock, tambe Miembro di Parlamento pa AVP, a haci un serie di pregunta na Promer Ministro Oduber encunto e compania. Despues a cuminsa tende cierto cosnan straño, manera Tico Croes a indica ayera.

Dia 18 di September 1989 tabata Tico Croes kende a lanza un cantidad di pregunta encunto e compania, na cual Allan Clobertidge, kende tabata con-

sehero di e partido MEP durante campaña electoral, tambe lo ta afilia. Tico Croes a muestra cu e tempo AVP a haya tende cu Gobierno lo a paga mas o menos Un Millon na e compania. Un

suma hopi alto, si tene cuenta cu ta 6 pa 7 luna so e compania por a traha pa Gobierno.

Na October y November informenan a cuminsa drenta cerca AVP cu APAT lo ta paga recibonan di MEP. E asunto a keda presenta na Gobierno durante un reunion publico y tabata dia 20 di December cu e Miembro di Parlamento pa AVP, Mito Croes, a puntra Ministro di Finanzas, Guillermo Trinidad, kico ta socediendo. Ministro Trinidad a pidi pa schors e reunion di Staten y despues cu e reunion a worde reanuda el a bisa cu e reunion no a worde yama pa trata asuntunan di APAT.

Tico Croes awor ta muestra cu ta sigur cu APAT a paga recibonan di MEP y a indica cu AVP ta acumula pruebanan den e caso aki. El a muestra ariba e insistencia di AVP pa haya con-

testa ariba preguntanan cu a worde haci na Gobierno y mientras contesta no ta worde duna, e caso mas y mas ta hole corrupcion.

E Miembro di Parlamento pa AVP a remarca cu si tin corrupcion mes, lo no straña AVP como cu den pasado ora cierto integrantenan di MEP a hiba AVP dilanti Mesa Berde pasobra AVP a califica nan como corrupto, nuebe Juez a bisa cu AVP no tin motibo pa rectificá su acusacion contra MEP.

Tico Croes a bisa cu pronto AVP ta bay tuma un decision si mester hiba e caso aki na e instancianan concerni. Si esey no a socede ainda ta pasobra AVP ta tene cuenta cu e forma cu Ministro di Justicia ta actua ariba tereno di Justicia.

Pero e asunto di APAT ta mantene atencion di AVP cu ta sigui busca mas informacion.